



蘇文忠公集卷一百十一

祝文

禱雨蟠溪文

歲秋矣物之幾成者待雨而已穠者已秀待雨而實  
三日不雨則穠者不實矣莢者已孕待雨而秀五日  
不雨則莢者不秀矣野有餘土室有閑民待雨而耕  
且種七日不雨則餘土不耕閑民不種矣穠者不實  
莢者不秀餘土不耕而閑民不種則守土之臣將有  
不任職之誅而山川鬼神將乏其祀茲用不敢寧居  
齋戒擇日並走群望而精誠不欺神不顧吝吏民無



所請命聞之曰號有周文武之師太公其可以病告  
乃用太褻之禮禱而不祠穀梁子曰古之神人有應  
上公者通乎陰陽君親帥諸大夫道之而以請焉夫  
生而為上公沒而為神人非公其誰當之詩曰緇師  
尚父時維鷹揚涼彼武王肆伐大商會朝清明公之  
仁且勇計其神靈無所不能為也吏民既以雨望公  
公亦當任其責敢布腹心公實圖之尚享

鳳翔太白山祈雨文

維西方挺持英偉之氣結而為此山惟山之陰威潤  
澤之氣又聚而為湫潭餅罌罐勺可以雨天下而况

於一方乎乃者自冬徂春雨雪不至西民之所恃以  
為生者麥禾而已今旬不雨即為凶歲民食不繼盜  
賊且起豈惟守土之臣所任以為憂亦非神之所當  
安坐而熟視也 聖天子在上凡所以懷柔之禮莫  
不備至下至於愚夫小民奔走畏事者亦豈有他哉  
凡皆以為今日也神其盍亦鑒之上以無負 聖天  
子之意下以無失愚夫小民之望尚享

奏乞封太白山神狀

附太守宋選作

伏見當府郿縣太白山雄鎮一方載在祀典案唐天  
寶八年詔封山神為神應公迨至 皇朝始改封侯



而加以濟民之號自去歲九月不雨徂冬及春農民拱手以待饑饉粒食將絕盜賊且興臣採之道塗得於父老咸謂此山舊有秋水試加禱請必獲響應尋令擇日齋戒差官莅取臣與百姓數千人待於郊外風色慘變從東南來隆隆獵獵若有驅導既至之日陰威凜然油雲蔚興始如車蓋既日不散遂彌四方化為大雨罔不周飮破驕陽於鼎盛起二麥於垂枯鬼神雖幽報答甚著臣竊以為功效至大封爵未充使其昔公而今侯是為自我而左降揆以人意殊為不安且此山崇高足亞五岳若賜公爵尚虛王稱校其有功實未為過伏乞 朝廷更下所司詳酌可否特賜指揮

告封太白山明應公文

天作山川以鎮四方俾食于民以雨以暘惟公聰明能率其職民以旱告應不踰夕帝謂守臣予嘉乃功惟新爵號往耀其躬在唐天寶亦賜今爵時惟術士探符訪藥謂為公榮寔為公差中原顛覆神不顧救今皇神聖惟民是憂民既飽溢 皇無禱求衮衣煌煌赤舄繡裳捨舊即新以佑我民尚享

杭州祭諸神文十首



祈雨龍祠

神食于民吏食于君各思乃事食則無愧吏事農桑神事雨暘匪農不力雨則時嗇招呼風霆來會我庭一勺之水膚寸千里尚享

祈雨吳山

杭之為邦山澤相半十日之雨則病水一月不雨則病旱故水旱之請黷神為甚今者止雨之禱未能踰月又以旱告矣吏以不德為愧神以不倦為德願終其賜俾克有秋尚饗

祈晴風伯

維神開闔陰陽鼓舞萬類行巽之權直箕之次陰淫為霖神能散之下土墊溺神能曠之發軔西北珥節東南風反雨霽神亦不慙尚享

祈晴雨師

天以風雨寒暑付於神亦如人君之設官置吏以治刑政也人君未嘗不欲民之安天亦何嘗不欲歲之豐乎刑政之失中民惟吏之怨雨暘之不時民亦不能無望於神也今淫雨弥月農工告窮歲之豐凶決於朝夕而並走群望莫肯顧答維天之所以畀於神神之所以食於民者庶其在此尚率厥職俾克有秋



尚享

祈晴吳山

歲既大熟惟神之賜害於垂成匪神之意築場為塗  
臥穰生耳農泣于野其忍安視生為楚英沒為吳豪  
烈氣不泯視此海濤反雨為暘何足告勞有絜斯醴  
匪神孰號尚享

奉詔禱雨諸廟

噫嗟艱歲胡閔斯雨念我東南舖饗中土迎秋餞伏  
農不再舉有事郊廟萬方畢助漕溝絕流庭實未  
旅下書哀痛超軼堯禹矧茲守臣廢食悼懼民之禍

福間不容縷今不愍救後訴無所天高莫謁神或可  
籲尚享

禱雨社稷四首

噫我侯社我民所恃祭于北墉蒼陰之義陽亢不反  
自春徂秋迄冬不雨嗣歲之憂吏民嗷嗷謹以病告  
錫之雨雪民敢無報尚享社神

神食于社蓋數千年更歷聖王訖莫能遷源深流遠  
愛民宜厚雨不時應亦神之疚社稷惟神我神惟人  
去我不遠宜軫我民尚享后土

農民所病春夏之際舊穀告窮新穀未遂其間有麥



如暘得涼如行千里弛擔得漿今神何心悲此雨雪  
敢求其他尚憫此麥尚享稷神

維神之生稼穡是力瘞身為民尚莫顧惜矧今在天  
與天同功召呼風雲孰敢不從豈惟農田井竭無水  
我求於神亦云亟矣尚享后稷

密州祭常山文五首

洪惟上帝以斯民屬於山川群望亦如天子以斯  
民屬於守土之臣惟吏與神其職惟通殄民廢職其  
咎惟均哀我邦人遭此凶旱流殍之餘其命如髮而  
飛蝗流毒遺種布野使其變躍飛騰則桑柘麥禾舉

罹其災民其固有子遺吏將獲罪神且乏祀茲用慄  
慄危懼謹以四月初吉齋居蔬食至于閏月辛丑若  
時雨沾洽蝗不能生當與吏民躬執牲幣以答神休  
嗚呼我州之望不在神乎父老謂神求無不獲克有  
常德以名茲山其可不答以愧此名若曰歲之豐凶  
在天非神之所得專吏將亦曰民之休戚在朝廷我  
何知焉則誰任其責矣上帝與吾君愛民之心一也  
凡吏之可以請于朝者既不敢不盡則神之可以  
謁于帝者宜無所不為尚享

我我茲山望我東國為帝司雨涵濡百物自我再禱



應不旋轂迨茲有秋歲得中熟嗟此薄禮曷稱其德  
陶匠並作新其楹桷豈以為報民苟不忤歲云徂矣  
粃麥未殖嗣歲之憂既謝且謁惠然雨我以永休烈  
尚享

比年以來蝗旱相屬中民以上舉無歲蓄量日計口  
歛不待熟秋田未終引領新穀如行遠道百里一宿  
苟無舍館行旅夜哭自秋不雨霜露殺殺黃糜黑黍  
不滿囷簾麥田未耕狼顧相目道之云遠飢腸誰續  
五日不雨民在坑谷猗嗟我侯靈應響速帝用嘉之  
惟新命服祈而不獲厥愆在僕洗心祇載敢詞屢瀆

庶哀斯民朝夕濡足尚享

天子有命閔茲旱暵俾我守臣並走群望惟神聰明  
慈惠求無不獲既再禱矣雖嘗一雨不及膚寸吏寔  
不德不足以蒙神之休導迎善氣以致甘澤洪惟  
聖天子之意其可不答而飢羸之民將轉于溝壑其  
可不一救之瀆神之罰吏其敢詞尚享

維熙寧九年歲次丙辰七月某日詔封常山神為潤  
民侯十月某日具位蘇軾謹以清酌少牢之奠昭告  
于侯之廟曰嗚呼旱蝗之為虐也三年於茲矣東南  
至于江海西北被于河漢饑饉疾疫靡有遺矣我瞻



四方大川喬嶽食于斯民者甚衆而受寵於 吾君者  
可謂巍巍矣訴之而必聞求之而必獲思我農夫而  
救其災沴不為倏雲驟雨苟以應禱之虛名而有膏  
澤積潤可以及民之實效卓然如侯者幾希矣凡天  
子之爵命有德而致之則為榮無功而享之則為辱  
今侯澤此一郡而施及于四鄰其受五等之爵而被  
七命之服也可謂無愧而有光輝矣願侯益脩其實  
以充其名上以副天子之意而下以塞吏民之望民  
其奉事有進而無衰矣尚享

徐州祭枯骨文一首

嗟爾亡者昔惟何人兵耶氓耶誰其子孫雖不可知  
孰非吾民暴骨纍纍見之酸辛為卜廣宅陶穴寬溫  
相從歸安各反其貞尚享

謝雪文一首

天不吝澤神不忘職胡為水旱吏則不德失政召災  
莫知自刻雨則號晴旱則謁雪神既不譴又滿其欲  
四山暮霰萬瓦晨白驅攘疫癘甲拆薶麥牲酒匪報  
維以告絜神食無愧吏則慙慄尚享

祭風伯雨師文一首

自秋不雨以至于今夏田將空秋種不入天子命我禱于



群望雲物既合風輒散之吏民皇皇不知所獲罪敢以  
薄奠訴于有神風若不作雨則隨至當以牲幣報神之  
賜若格絕天澤弃民乏祀上帝臨視神其不然尚享  
湖州謁文宣王廟文一首

至聖文宣王竊惟吏治以仁義為本教化為急故以  
視事之三日祇見于先聖先師問所當先於學其所  
從來尚矣敢忘其舊尚享

西路關雨於濟瀆河瀆淮瀆廟祈雨祝文

伏以水旱之事山川所司農服穡以有  
秋天密雲而不雨愧我不德瀆于有神願  
為三日之霖大慰一方之望國有常報我其敢忘尚  
饗

東太一宮翻修昭宇奏告十神太一真君祝  
文

維元祐四年歲次己巳二月壬寅朔二十二日癸亥  
嗣天子臣名謹遣在宅神勾當東太一宮臣鄧惟濟  
恭告于五福十神太一直君於穆祠宮有嚴春祀吏  
以時而按視工揆日以修完庶就潔新永綏靈御仰  
祈昭鑒大庇含生尚饗

生擒西番鬼章奏告永裕陵祝文



維元祐二年歲次丁卯九月庚戌朔某日孝子嗣皇帝臣名謹遣朝奉郎試右諫議大夫上騎都尉賜紫金魚袋臣孔文仲敢昭告于皇考神宗英文烈武聖孝皇帝大彌獲禽必有指蹤之自豐年高廩孰知耘耔之勞憬彼西戎古極右臂自嘉祐末兀征擾邊至熙寧初董氈抗命於法聖考恭行天誅非貪尺寸之疆蓋為民除毒賊遂隸長久之策不以賊遺子孫而西蕃大首領鬼章首服南川北連拓拔申命諸將擇利而行旋聞偏師無功不克吏士用命爭酬未報之恩聖靈在天難逃不測之網已於八月戊戌生獲

鬼章頡利成擒初無涓水之耻邛支授首聊報谷古之冤謹當推本聖心益修戎器務在服近而來遠期於偃革以息民仰冀威靈曲垂昭鑒尚饗

西京會聖宮應天禪院奉安神宗皇帝御容前一日奏告永裕陵祝文

維元祐二年歲次丁卯十月己卯朔孝子皇帝臣名謹遣朝奉郎試中書舍人上騎都尉賜紫金魚袋蘇轍敢昭告于皇考神宗英文烈武聖孝皇帝國家推本漢儀立郡國之制參用唐制就佛老之祠乃眷洛都載瞻園寢並興聖宇以奉神禧閔予冲人恭蹈



成憲謹擇良日臨遣近臣庶回日月之光少答天人  
之望尚饗

神宗皇帝御容至會聖宮并應天禪院前一日奏告 諸帝祝文

維元祐二年歲次丁卯八月某朔某日孝孫嗣皇帝  
臣名謹遣某官某敢昭告于 宣祖昭武睿聖皇帝  
三靈眷命六聖在天崇洛之間僊釋所館惟茲吉梯  
之始當祔出游之庭念彼元臣昔皆侑食載新惟肖  
之象永陪如在之神敢冀威靈曲垂昭鑒尚饗

神宗皇帝御容進發前一日奏告天地社稷

宗廟等處祝文

維元祐二年歲次丁卯九月庚戌朔二十五日甲戌  
嗣天子臣名謹遣某官某敢昭告于 昊天上帝祗  
畏天明率循祖武建衣冠之原廟鎮崧洛之靈祠恭  
擇良辰啓行僊馭分遣執事並告有神尚饗

太皇太后皇太后皇太妃受冊禮畢奏謝天  
地社稷宗廟諸宮觀并諸該祝文

維元祐二年歲次丁卯十月己卯朔十二日己丑嗣  
天子臣名謹遣某官某敢昭告于 昊天上帝至哉  
坤元政必先於治內養以天下孝莫大於尊親昔首



正於號名今復嚴於典冊禮樂既具神人允諧分命  
通臣諸陵改分命通臣恭致成事仰祈昭鑒永錫洪  
休無任懇禱之至謹祠

永定院修蓋舍屋奏告 諸帝后祝文

維元祐二年歲次丁卯某月某朔某日孝皇帝孫嗣皇  
帝臣名謹遣某官敢昭告于 太祖啓運立極英武  
睿文神德聖功至明大孝皇帝具嚴淨宇祇奉寢園  
眷惟焚燎之餘少緩增修之役仰祈昭鑒永底燕寧  
尚饗

永定院修蓋舍屋祭告土地祝文

伏以向因遺燼延及淨祠爰擇良辰以興衆役耳茲  
遣使詔示有神

杭州謁廟祝文一首

軾以王命來守此邦事神養民敢不祇飭蒞政之始  
見于祠下安靜無事豐樂有年惟神相之使免罪戾  
尚享

謁文宣王廟祝文一首

軾以諸生誤蒙選擢昔自太史通守此邦今由禁林  
出使浙右莅事之始祇見儒宮聖神臨之敢忘夙學  
尚享



蘇文卷一百一十一  
祭英烈王文一首

欽誦舊史仰瞻高風報楚為孝徇吳為忠忠孝之至  
實與天通開塞陰陽幹旋濤江保鄣斯民以食此邦  
嗟我蠢愚所向奇窮豈以其誠有請輒從庚子之禱  
海若伏降完我岸閘千夫奏功牲酒薄陋報微施豈  
敢陳頌詩侑此一鍾

杭州祝文八首

祈雨祝文

杭州之為郡負山帶江水澤不留逾旬不雨農有憂  
色挽舟浚河公私告病吏既無術莫知所救不敢坐

視惟神之求庶幾閔民之窮赦吏之瀆賜以一雨  
敢忘其報尚享

謝雨祝文

舊穀不登陳廩已發稍失雨暘之節則懷溝壑  
之憂惟神至明有禱必應敢陳薄奠少荅殊私願  
推無倦之仁以畢有年之賜尚享

祈晴祝文

大雪連日凝陰傷春閔惟艱食之民重此常寒之  
虐役兵墮指行旅摧輶老弱號呼吏既慙於無術  
陰陽舒卷神何惜而不為顛掃重雲以昭靈貺使



民奉事永歲益虔尚享

謝雨祝文

軾以憂寄出守此邦歲之不登實任其咎政雖無術  
心則在民惟神聰明其應如響雨不暴物晴不失時  
喜愧之心吏民所共式陳菲薦少荅神休尚享

祈晴祝文吳山廟

秋穀未登既食其陳嗣歲之虞當歛其新建此秋暘  
載穫載春陰雨害之穡人罔功我發庫泉以實高廩  
曷救雨官端止其淫既暘我場萬杵皆作待此坻京援  
我溝壑英文烈武雨霽在予稽首告病其恩弗圖尚享

謝晴祝文

敢以清酌庶羞之奠昭告于某神賞罰在朝吏申明  
之及其有愆吏得正之雨暘在天神奉行之及其不  
時神得請之惟吏與神各率其職有求必獲則無虛  
食淫雨既止惟神之功肴酒匪報惟以告衷尚享

開湖祭禱吳山水仙五龍三廟祝文

杭之西湖如人之有目湖生芡葑如目之有瞖翳久  
不治目亦將廢河渠有膠舟之苦鱗介失解網之惠  
六池化為皆井而千頃無復豐歲矣是用因賑卹之  
餘資興開鑿之利勢百日奏功所患者淫雨千夫在



野所憂者疾癘庶神明之陰相與人謀而協濟魚龍  
前導以破堅孤葦解拆而迎銳復有唐之舊觀盡四  
山而為際澤斯民於無窮宜事神之益勵我將大合  
樂以為報豈徒用樽酒之薄祭也尚享

謝吳山水仙王五龍三廟祝文

西湖堙塞積歲之患坐閱百吏熟視而歎惟愚無知  
妄謂非難禱于有神陰假其便不愆于素咸出幽贊  
大堤雲橫老葦席卷歷時未幾功已過半嗣事告終  
來哲所繕神卒相之罔拂民願肴酒之報我愧不腆  
尚享

潁州謁文宣王廟祝文一首

軾以諸生遭遇入侍帷幄出典民社蒞事之始祇見  
于學先聖先師實臨之敬行所聞敢忘其舊尚享

謁諸廟祝文一首

軾以侍臣出守承宣上意以民為本祇敬事神所以  
庇民蒞事之始祇見祠下尚享

德音到州祭諸廟祝文一首

維年月日具位蘇軾謹以清酌庶羞之奠敢昭告于  
某神上清儲祥宮成敷宥四海均福于下有詔守臣  
凡在秩祀罔不祇薦維神導和却沴保民無疆以稱



朝廷至仁之意尚享

祈雨迎張龍公祝文

維元祐六年歲次辛未十月丙辰朔二十五日庚辰  
龍圖閣學士左朝奉郎知潁州軍州事蘇軾謹請州  
學教授陳師道并遣修德承務郎迨以清酌庶羞之  
奠敢昭告于昭靈侯張公之神稽首龍公民所祇威  
德博而化能潛能飛食于潁人淮潁是依受命天子  
命服有輝為國庇民凡請莫違歲旱夏秋秋穀既微  
冬又不雨麥稿而腓閔閔農夫望歲畏飢並走羣望  
莫哀我歆於赫遺蛻靈光照幃惠肯臨我言從其妃

翻舞雩詠薦其絜肥雨雪在天公執其機游戲俛仰  
千里一麾被及淮甸三輔王畿積潤滂流浹日不晞  
我率吏民鼓鐘旄旂拜送于郊以華其歸尚享

送張龍公祝文一首

維元祐六年歲次辛未十二月乙酉朔十日甲午龍  
圖閣學士左朝奉郎知潁州軍州事兼管內勸農使  
輕車都尉賜紫金魚袋蘇軾謹以清酌庶羞之奠敢  
昭告于昭靈侯張公之神赫赫龍公甚武且仁赴民  
之急如謀其身有不應祈惟汝不虔我自洗濯齋居  
誠陳旱我之罪勿移於民公顧聽之如與我言王質



金相其重千鈞惠然首來其者四人眷此行宮為留  
浹夜再雨一雪既洽且均何以報之榜銘皆新詔公  
之德于億萬年惟師道追復餞公還咨爾庶邦益敬  
事神尚享

立春祭土牛祝文一首

三陽既應庶草將興爰出土牛以戒農事丹青設象  
蓋惟風俗之常耕獲待時必有陰陽之助仰惟靈德  
佑我穡人尚享

謝晴祝文一首

吏既不德致災病民一雨一霽輒號于神風回雪止

農事並作神則有功吏亦知忤凍餒之蘇其賜不貲  
嗟我吏民為報之微尚享

祈雨僧伽塔祝文一首

維元祐七年歲次壬申三月甲申朔十二日乙未龍  
圖閣學士左朝奉郎新知揚州軍州事充淮南東路  
兵馬鈐轄蘇軾謹以香燭茶果之供敢昭告于大聖  
普照王之塔淮東西連歲不稔農末皆病公私並竭  
重以浙右大荒無所仰食望此夏田以日為歲大麥  
已秀小麥已孕時雨不至垂將焦枯凶豐之決近在  
旬日軾移守廣陵所部十郡民窮為盜職所當憂才



短德薄救之無術伏願大聖普照三以解脫力行平等慈愍欠雲雷咳唾雨澤救焚拯溺不待崇朝敬瀝肝膽尚鑒聽之

定州謁諸廟祝文一首

惟皇上帝分命郡祀降釐下土惟我元后臨遣近臣鎮撫一方幽明雖殊保民惟均莅事之始祇見祠下若賦政疵類敢逃其罰雨暘以時疾疫不作亦竊有望于神尚享

謁文宣王祝文一首

執以諸生進位于朝入參侍從出典方面莅事之始

祇見廟下居敬行簡以臨其民軾雖不敏請事斯語尚享

北嶽祈雨祝文一首

維元祐九年歲次甲戌四月壬寅朔十六日丁巳端明殿學士兼翰林侍讀學士左朝奉郎定州路安撫使兼馬步軍都總管知定州軍州及管內勸農使輕車都尉賜紫金魚袋蘇軾敢以制弊茶果清酌之奠敢昭告于北嶽安天元聖帝都城以北燕薊之南既徂歲而不登又歷時而未雨公私並竭農永皆傷麥將稿而禾未生民既流而盜不止豐凶之快近在浹



辰溝壑之憂上貽當宁仰止喬嶽食于朔方卷舒雲霓呼吸雨霽若其安視小民之急何以仰符上帝之仁軾以短才謬膺重寄儻有罪以致旱寧降罰于微躬今者得請于朝齋居以禱旦夕是望吁嗟而求雨我夏田兼致西成之富實茲邊廩少寬北顧之憂拜賜以時敢忘其報尚享

立春祭土牛祝文一首

敢昭告于勾芒之神木鐸傳音官師相儆土牛示候稼穡將興敢徵福于有神庶保民於卒歲無作水旱以登麥禾尚享

春祈北嶽祝文一首

西起太行東屬碣石南至于河皆神所食吏謹刑政農畢其力風雨時若則神之職方此東作敬薦其潔錫之豐歲以照靈德尚享

春祈諸廟祝文一首

天既祐民必期於無害農惟望歲敢請于有神願疾沴之不興庶風雨之時若敢忘舊典以報豐年尚享  
祈雨諸廟祝文一首

其神之靈夫歲之秋民苦飢饉望此一麥以日為歲不雨彌月敢以病告與其救之於已竭不若起之於



未枯敢冀有神時賜甘澤豐登之報我其敢忘尚享  
定州辭諸廟祝文一首  
軾得罪于朝將適嶺表雖以謫去敢不告行區區之  
心神所鑒聽尚享

告文宣王文

嗟嗟元王三代之英言不鉤用於一君而為無窮之  
遺教身不寵利於一時而有不朽之餘榮嗟嗟元王  
以道而鳴肆筆成書吐辭為經炳然不渝言若丹青  
久而愈盈聲非雷霆瞽者可以使剔目以駭視瞽者  
可以使扶耳以聳驚柰何轍環天下卒老于行載空

言於典籍示後世之儀形回狂瀾於既倒支大厦於  
將傾揭日月之昭昭破陰氛之冥冥嗟乎一氣之委  
和與萬物之至精或為淮夷之蠙珠或為雲漢之華  
星雖光輝之成彩未離乎散聚以流行豈若王之道  
德愈久而弥明曄曄而華涵涵而停融而在天者為  
雲漢之文章結而在地者為山嶽之元靈詭然如龍  
翔鳳躍純乎玉振而金聲嗟嗟元王德博難名某  
奉主命俯臨邊城畝有滯穗境無交兵鳴玉載道紛  
袍在庭有踐邊豆有豐采盛敢用昭薦饗于克誠

告顏子文



志不行于時而能驅世以歸仁澤不加于民而能顯道以終身德無窮通古難其人惟公能之絕世離倫富貴不義視之如雲飲止一瓢不憂其貧受教孔子門人益親血食萬世配享惟神敢不昭薦公平有聞相天以育物者五方之帝也配地以作鎮者五嶽之神也天為真君帝為真宰五嶽者三公之象也某叨受朝寄出守藩土神不虐罰民有豐歲敢用吉誠以謝靈既

秋賽二首

惟神聰明為民依庇宜秩典祀欽奉靈祠况農事之肇興賴神靈之降宥一邦蒙惠已膺風雨之時百里有嚴將享秋冬之報惟神光昭祀典幽贊化功享廟食以惟嚴垂介福而無爽屬茲豐歲爰舉舊規式陳蠲潔之儀冀報有年之慶

杭州禱觀音祈晴文

三吳之災連歲不稔尚賴朝廷之澤大分倉廩之陳乃眷疲羸僅免流殍今者淫雨彌月秋成半空永惟嗣歲之憂將有流離之懼我大菩薩行平等慈觀此



衆生皆同赤子反雨暘於指顧化豐歉於斯須雖某等不德而召災念斯民無辜而可憫願行慈率一拯含生

謝觀音晴文

民無常心固何知於帝力天作淫雨當有感於佛慈慧光照臨陰沴消復拯農工於溝壑寬吏責於簡書某等共銜不報之恩顛頌難名之德恭馳梵宇少薦微誠

祈晴文

常平之政觀歲義惡操其贏虛以馭農末秋穀未登已食其陳嗣歲之虞當歛其新迨茲秋暘載穫載春陰雨害之穡人罔功我發庫泉以實高廩盍勅雨官遏止其霽既暘我場萬杵皆作待此坻京援我溝壑不顯大神雨霽在予匪民焉依其忍弗圖

謝晴文

天作淫雨害于梁盛蒙神之休猶得中蒸薄奠匪報式昭厥誠

祈雨文

六月不雨乃時之常或霖或霽於稼則傷稼將有秋民飢所望某也不德守此一方罪在守臣無俾民殃



人不能神易雨而賜神其聽之庶乎降康

### 謝雨文

竊以農事告成旱魃為沴寢罹焦爍之害遂稽収刈之勤自非降靈大庇羣俗以下膏澤之賜庶有豐盈之期實神助之使然豈愚誠之能致是用特臨神宇再款眸容輒傾涓潔之誠仰荅靈威之祐

### 祈雪霧猪泉文

噫嘻我民何辜于天不水則旱于今二年天未悔禍首日不雨雪不歛塵麥不蓋土天子命我禱于山川側聞此山神龍之淵躬拜稽首敢丐一勺得雪盈尺

牲酒是酢

### 祈雪文

水旱輒求惟吏之羞有求不倦惟神之休乙卯之雪膚寸而已如燔輿薪救以勺水嘉肴旨酒既謝且祈願終其賜盈尺為期

### 祭勾芒神文

夫帝出乎震神實輔之茲日立春農事之始將平秩於東作先恭授於人時乃出土牛以示早晚惟神其祐之春律既應農事將作爰出土牛以為耕候維爾有神實左右之雨暘以時螟螣不作以克有年敢忘



其報

祭佛陀波利文

積雪始消陰沴再作小民無辜弊于飢寒草木昆虫  
悉罹其虐並走羣望祈而未報意雨霽有數非神得  
專惟我大士含法分無為不入塵數願以大解脫力  
作不可思議事愍此無生豁然開明盡二月晦雨雪不作大  
拯羸餓以發信根此大布施寶無限量惟大士念之

祭常山神文

吏實不德無以道迎順氣消復災沴惟神之求神亦  
閱其不才而嘉其勤凡有告請靡所不答乃者有謂

乎神即退之三日時雨周洽去城百里而近蝗獨不  
生凡我吏民孰不歸德于神然而一雨之後彌月不  
繼百里之外蠃生如初豈神能變應於前不能應於  
後能卹其近不能卹其遠盖吏不稱職政刑失中戾  
于民心以不能終神之賜而我州之民比歲飢殍凋  
殘之餘不復堪命若又不熟則流離之禍其莫知所止  
矣神之聰明其忍以吏不稱職之所致而不卒救之與  
今夏麥垂登而秋穀將槁若時賜霈澤驅攘蟲災以  
完我西成之資歲秋九月當與吏民復走廟下

祭泗州塔文



淮南東西連歲不稔士農皆病公私並竭重以浙右  
大荒無所仰食望此夏苗以日為歲大麥已秀小麥  
初孕時雨不至垂將焦枯豐凶之決近在旬日某移  
牧廣陵所部十郡民窮為盜吏職所憂寸短德薄救  
之無術伏願大聖普照王以解脫力行平等慈愍欠  
風雷咳嗽雨澤救焚拯溺不待崇朝敬瀝肝膽尚矜  
聽之

某上承府檄旁採民言供奉安輿願登法座伏願江  
海資潤龍天會朝布為三日之霖適副一邦之望

禱龍水文

雲布多峯日有焚空之勢雨無破塊人懷暵虐之憂  
雖屢叩於明靈終未懷於通感府主舍人存心為國  
俯念輿民燃香霽以禱祈對龍湫而懇望伏願明靈  
敷感使雨澤以旁滋聖化存臻致田疇之益濟

祈晴文

均糴之法著于甲令視歲豐凶以馭重輕歲且中熟  
雨則害之如此失時公私交病神食此上民命係焉  
無俾歉荒以作神羞



蘇文忠公集卷一百十一

蘇文忠公集卷一百十二

祭文

祭大覺禪師文一首

維年月日具位蘇軾謹以香茶蔬果致祭故大覺禪  
師器之之靈於穆 仁祖威神在天山陵之成二十  
九年當時遺老存者幾人矧如禪師方外之臣頌詩  
往來月壁星珠昭回之光下燭海隅昔本無生今亦  
無滅人懷 昭陵涕泗哽噎我在壯歲屢親法筵魄  
奠示別豈免悽然尚享

祭歐陽文忠公文一首潁州



維元祐六年歲次辛未九月丙戌朔從表姪具位蘇軾謹以清酌肴果之奠昭告于故太師究國文忠公安康郡夫人之靈嗚呼軾自齒齒以學為嬉童子何知謂公我師晝誦其文夜夢見之十有五年乃克見公公為拊掌歡笑改容此我輩人餘子莫羣我老將休付子斯文再拜稽首過矣公言雖知其過不敢不勉契闊艱難見公汝陰多士方譁而我獨南公曰子來實獲我心我所謂文必與道俱見利而遷則非我徒又拜稽首有死無易公雖云亡言如皎日元祐之初起自南遷叔季在朝如見公顏入拜夫人羅列諸

祭張文定公文三首

孫敢以中子請婚叔氏夫人曰然師友之義凡二十年再升公堂深衣廟門垂淚失聲白髮蒼顏復見穎人穎人思公曰此門生雖無以報不辱其門清穎洋洋東注于淮我懷先生豈有涯哉尚享

維元祐六年歲次辛未十二月乙卯朔八月壬戌門生龍圖閣學士左朝奉郎知穎州軍州事兼管內勸農使輕車都尉賜紫金魚袋蘇軾謹以清酌庶羞之奠昭告于故太子太保樂全先生張公之靈嗚呼道大如天見存手人小智自私莫識其真公生而悟得



其金淳久乃妙物凜然疑神初如龍鳳不可擾馴游  
于帝郊尚以其仁可望可見而不可親師心而行自  
屈自信八十五年以沒元身我先大夫古之天民被  
褐懷寶陸沈我岷公曰惜哉王國之珍此太史公筆  
回千鈞獨置一榻不延餘賓時我兄弟尚未冠紳得  
交于公先子是因我晚聞道困于垢塵每從公談棄  
故服新頃獨怪公倒廩傾因盡發其秘有懷畢陳曰  
再見子恐無復展出戶遲遲默焉銜辛穆穆 昭陵  
二三元臣惟公終始高節邁倫一慟永已山摧川堙  
公視富貴如賤與貧公視生死如夕與晨老不惰媮  
疾不嘖呻有化非亡有隱非淪我獨何為涕流于巾  
嗚呼哀哉尚享

軾於天下未嘗誌墓獨銘五人皆盛德故偉歟我公  
實浮於聲知公者天寧侯此銘今公永歸我留淮海  
寓辭千里濡袂有淮尚享

我游門下三十八年如俯仰中十五年間六過南都  
而五月公升堂入室問道學禮靡求不供有契于心  
如水傾海如橐鼓風風水之合豈特無異將初無  
同孰云此來慟哭不聞高堂莫空歛不拊棺葬不  
執紼我愧于膏公知我深我豈不知公之所從不



不求人沒不求天自與天通天不吾欺壽考之餘  
報施亦豐一子四孫鸞鵠在庭以華其終自我先  
子逮今三世為好無窮以我此心與此一觴達于  
幽宮尚饗

祭龍井辯才文一首

嗚呼孔老異門儒釋分宮又於其間禪律相攻我  
見大海有北南東江河雖殊其至則同雖大法師  
自戒定通律無持破垢淨皆空講無辯訥事理皆  
融如不動山如常撞鍾如一月水如萬竅風八十  
一丰生雖有終遇物而應施則無窮我初適吳尚

見五公講有辯臻禪有璉嵩後二十年獨餘此翁  
今又往矣往生誰宗道俗款歔山澤改容誰持一  
盃往吊井龍我去杭時白叟黃童要我復來已許  
于中山無此老去將安從噫參寥于往莫必躬豈  
無他人莫寫我膏

祭亡妻同安郡君文一首

維元祐八年歲次癸酉八月丙午朔初二日丁未  
具位蘇軾謹以家饌酒果致奠于亡妻同安郡君  
王氏二十七娘之靈嗚呼昔通義君沒不待年嗣  
為兄弟莫如君賢婦職既修母儀甚敦三子如一



愛出于天從我南行救水欣然湯沐兩郡喜不見  
顏我曰歸莊行返丘園曾不少須棄我而先孰迎  
我門孰餽我田已矣柰何淚盡日乾旅殯國門我  
實少恩惟有同穴尚蹈此言嗚呼哀哉尚饗

祭韓公獻忠文一首定州

維元祐八年歲次癸酉十一月初一日乙亥端明  
殿學士兼翰林侍讀學士左朝奉郎定州路安撫  
使兼馬步軍都總管知定州軍州事上輕車都尉  
賜紫金魚袋蘇軾謹以清酌庶羞之奠昭告于魏  
國忠獻公之靈嗚呼我生雖晚尚及昔人堂堂魏

公河嶽之神四十餘年其德日新鍾鼎有盡竹帛  
莫陳惟其大節故以一言忠以事君允也上臣我  
與弟轍來自峨嵋公罔羅之若獲鳳麟契闊艱難  
手書見存勿以大臣笑彼汗顏援手拯溺期我於  
仁豈知無用既老益頑意廣才疎將歸丘園上未  
忍棄畀之中山公治此邦沒食其民我獨何幸故  
踐後塵公惟人傑而不自賢堂名閱古以古律身  
况我小生罕見寡聞敢不師公治民與軍雖無以  
報不辱其門尚饗

大行太皇太后靈駕發引文一首定州



因山告成同軌畢至玉衣永閔風馭莫追萬國山  
河尚憑於坤載四方老穉遽失於母慈欲強名言  
難形德化積此九年之澤輔成百世之安乃眷中  
山控臨朔野華戎異服涕慕同聲目斷東朝永絕  
簾帷之望神馳西洛想聞笳鼓之音臣等各守邊  
垂莫親饋奠徒因僚吏遠致攀虎尚郎食

祭滕大夫母楊夫人文一首

維元祐九年歲次甲戌三月壬申朔端明殿學士  
兼翰林侍讀學士左朝奉郎知定州軍州事蘇軾  
謹以清酌庶羞之奠昭告于近故長安縣太君楊

氏之靈嗚呼士盛慶曆如漢武宣用兵西方故西  
多賢惟時滕公實顯于西文武殿邦尹范是齊功名  
不終有命有義我時童子為公喟四十餘年墓木  
十圍乃識其子傾蓋不疑心厚且文前人是似秉心  
平反慈訓則尔仰止德人八岡如陵升堂而拜我愧  
未能豈其微疾一慟永已胡不百年以慰其子壽祿  
在天考終非亡鵲巢之應子孫其昌尚饗

惠州祭枯骨文一首

爾等暴骨于野莫知何年非兵則民皆吾赤子恭惟  
朝廷法令有掩骼之文監司舉行無吝財之意是用



一新此宅永安厥居所恨犬豕傷殘螻蛄穿穴但為  
叢冢罕致全軀幸雜居而靡爭義同兄弟成解脫而  
無戀超生人天極樂之國尚饗

祭亡妹德化縣君文一首

嗚呼宮傳之孫十有六人契濶死生四人僅存維我  
令妹慈孝溫文事姑如母敬夫如賓玉立二甥實華  
我門一秀不實何辜干神謂當百年觀此騰振云何  
俯仰一顛再呻救藥靡及奄為空雲萬里海涯百日  
計聞柩棺何在夢淚濡茵長號北風寓此一搏

祭柳仲遠文二首

嗚呼哀哉我生多故愈老愈艱親朋幾人日化日遷  
逝者如風計來逾年一慟海徼摧曾破肝痛我令妹  
天獨與賢德如召南壽甫見孫矧我仲遠孝友恭溫  
天若成之從致有聞富以學術又昌以言久而不試  
理豈其然崎嶇有求凡以為親雖不負米實勞且勤  
知止于此不如歸閑哀我孤甥孝如閔顏銜痛遠許  
誰撫誰存逝者已矣存者何寃慎勿致毀以全汝門  
以慰我仲遠永歸之寃嗚呼哀哉尚饗

我厄于南天降罪疾方之古人百死有溢天不我亡  
亡其朋歲如柳氏妹夫婦連璧云何兩逝不慈遺一



我歸自南宿草再易哭隨其目泉壤咫尺闕也有文  
氣貫金石我窮且老似舅何益易其墓側可置高室  
天定勝人此語其必尚饗

祭吳子野文一首

嗚呼子野道與世違寂默自求闔門垂幃兀爾  
有似子微或似壺子杜氣發機徧交公卿靡所  
急人緩已忘其渴飢道路為家惟義是歸卒老  
終不自非送我此還中道弊衣有疾不樂但却甘肥  
問以後事一笑而麾飄然脫去雲散露晞我獨何為  
感歎歔歔一酌告訣逝舟東飛尚饗

祭歐陽文忠公文一首

嗚呼哀哉公之生於世六十有八年民有父母國有  
著龜斯文有傳學者有師君有所恃而不恐小人  
有所畏而不為譬如大川喬嶽不見其運動而功利之及  
於物者蓋不可以數計而周知今公之沒也赤子無所  
仰茫朝廷無所稽疑斯文化為異端而學者至於用夷  
君子以為無為為善而小人沛然自以為得時譬如深  
淵大澤龍亡而虎逝則變怪雜出舞魍魎而號狐狸昔其  
未用也天下以為為病而其既用也則又以為及其釋  
位而去也莫不異其復用至其請老而歸也莫不惆



悵失望而猶庶幾於萬一者幸公之未衰孰謂公無復有意於斯世也奄一去而莫予遺豈厭世溷濁繫身而逝乎將民之無祿而天莫之遺昔我先君懷寶遁世非公則莫能致而不肖無狀因緣出入受教於門下者十有六年於茲聞公之喪義當匍匐往救而懷祿不去愧古人以忸怩緘詞千里以寓一哀而已矣蓋上以為天下慟而下以哭其私嗚呼哀哉尚享

祭魏國韓令公文一首

天生元聖必作之配有神司之不約而會既生堯舜禹稷自至 仁宗龍飛公舉進士妙齡秀發秉筆大侍

公於是時仲舒賈誼方將登庸盜起西夏四方騷然帝用不赦授公鉞鉞往督西旅公於是時方叔召虎人贊兵政出殿大邦恩威並行春雨秋霜兵練民安四夷屈降公於是時臨淮汾陽帝在明堂欲行王政群后奏功罔底于成召自北方付之樞衡公於是時蕭曹魏邴二帝山陵天下悻怛呼吸之間有雷有風有存有亡有兵有戎公於是時伊尹周公功成而退三鎮偃息天下噉然曷日而復畢公在外心在王室房公且死征遼是卹嗚呼哀哉六月甲寅人之無祿喪我宗呂我有黎民誰與教之我有子孫誰與保



之魏魏堂堂寧復有之公之云云我無日矢慟哭涕  
流何嗟及矣昔我先子沒于東京公為二詩以祖其  
行文追典誥論極皇王公言一出孰敢改評施及不肖  
待以國士非我自知公實見謂父子昆弟並出公門  
公不責報我豈懷恩惟此涕泣寔哀斯人有肉在  
俎有酒在樽公歸在天寧聞我言嗚呼哀哉尚饗

祭柳子玉文一首

猗歟子玉南國之秀甚敏而文聲發自幼從橫武庫  
炳蔚文園獨以詩鳴天錫雄味元輕白俗郊寒島瘦  
嘹然一吟衆作卑陋凡今鄉相伊昔朋舊平視青雲

可到寧驟孰云坎坷白髮垂脰才高絕俗性疎來詬  
謫居窮山遂侶猩狔夜衾不絮朝甌絕餽慨然懷歸  
投奔纓綬潛山之麓往事神后道味自飴世芬莫艱  
凡世所欲有避無就謂當乘除併畀之壽云何不淑  
命也誰咎頃在錢塘惠然我觀相從半歲日飲醇酎  
朝遊南屏暮宿靈鷲雪窓飢坐清閨間奏沙河夜  
歸霜月如畫綸巾鶴氅驚笑吳婦會合之難如次組  
繡翻然失去覆水何救維子耆老名德俱茂嗟我後  
來匪友惟媿子有令子將大子後頽然二孫則謂我  
舅念子永歸涕如懸霑歌此奠詩一樽往侑尚享



祭單君貺文一首

嗚呼維君篤孝自天展如閔予人莫聞言內齊于家  
外敏于官民謂父兄吏莫容姦信于朋友人得其  
驪博學工詩數術精研人涉其一君有其全壽考富  
貴人誰不然君獨何幸所向奇偏志不一遂悵莫歸  
怨念我孤甥生逢百艱既嬪于君謂永百年云何不  
弔銜痛重泉何以慰君千里一樽人生如夢何促  
何延厄窮何陋官達何妍命也奈何追配牛顏嗚呼  
哀哉尚享

祭胡執中郎中文一首

胡君執中之靈君少在蜀從先府君兄蜀之士事賢  
友仁我之知君固不待見從事于岐始識君面相從  
之歡傾蓋百年見其孺子駒駁雞鷄非罪失官君則  
先去我徂華州見君逆旅淫雨彌旬道淖沒車他人  
為泣君樂有餘其後七年君掾計省雖獲一笑歡下  
逾頃又復七年我守北徐君從其子徐獄是書雞騫  
而翔駒亦千里惟我與君宛其老矣老人無徒相見益  
親凡昔在岐今存幾人謂君仁人雖疾當壽云何而  
然命也難究嗚呼執中人誰不死如君之賢不云止此  
百鍊之剛日膾千牛厘而不用非我之羞孺子肖君



世有令問送君一觴永歸無恨尚饗

祭任鈴轄文一首

嗟君結髮從事於兵四十餘年公侯扞城更嘗世故練達物情佐我治軍既嚴且平吏士肅然時靡有爭汴泗橫流郭堞圯傾風埃霧豁奔走經營興疾而歸猶莫敢寧奄忽不救聞者歎嗟馬子孫如林布褐藜羹生知其勤死知其清酹觴告訣與涕俱零尚享

祭歐陽仲純父文一首

仲純父之靈曰嗚呼哀哉文忠公之盛德子孫千億與宋無極人惟曰不足仲純父之賢壽考百年一歲

九遷人惟曰當然奈何官止於一命壽不登四十惟其尸之百不償一嗚呼哀哉此不足云也仲純父之生也不以進退得喪有望於人豈其死也乃以死生壽夭有責於神人徒知其文章之世其家操行之稱其門而不知其志氣之豪健議論之剛果使之臨大事立大節不難於殺身以成仁則夫造物者之挾其死生之權也豈能病君也哉雖然往者見君於潁水之上去歲君來見我於國門之東携被夜語達旦不窮凡所以謀道憂世而教我以保身遠翫者凜乎其有似於文忠今也奄兮忽焉而不復見也能不長號而



屢慟乎道之難行蓋難其人豈無其人利害易之  
如仲純父不畏不慕獨立不懼則死及之嗚呼哀哉尚饗

祭王君錫丈人文

公之皇祖孝著閭里迨茲百年世濟其美少相弟長  
孝相慈誨肅雍無間施及娣姒頽然四人厥德罔二軾  
始婚媾公之猶子允有令德天閔莫遂惟公幼女嗣  
執壘篚恩厚義重宜有以報云何不淑契闊生死歟  
不拊棺葬不親祔豈不懷歸眷此微仕緘詞望爽以  
致奠醑惟此哀誠一念千里尚享

祭文與可文一首

年月日從表弟蘇軾謹以清酌庶羞之奠致祭于故  
湖州文府君與可學士兄之靈曰嗚呼哀哉與可能  
復飲此酒也夫能復賦詩以自樂鼓琴以自侑也夫  
嗚呼哀哉余尚忍言之氣噎悒而填膺淚疾下而淋  
衣忽收淚以自問非夫人之為慟而誰為乎道之不  
行哀我無徒豈無友朋逝莫告余惟余與可匪亟匪  
徐招之不来麾之不去不可得而親其可得而踈之  
耶嗚呼哀哉孰能惇德秉義如與可之和而正乎  
孰能養民厚俗如與可之寬而明乎孰能為詩與  
楚詞如與可之婉而清乎孰能齊寵辱忘得喪如



與可之安而輕乎嗚呼哀哉余聞訃之三日夜不眠而坐喟夢相從而驚覺滿茵蓆之濡淚念有生之歸盡雖百年其必至惟有文為不朽與有子為不死雖富貴壽考之人未必皆有此二者也然余嘗聞與可之言是身如浮雲無去無來無亡無存則夫所謂不朽與不死者亦何足云乎嗚呼哀哉尚饗

祭刁景純墓文

嗟我少君四十二歲君不我少謂我昆弟今我已老鬢質頽蒼然君之永歸不為無年我獨何憾過期而哭人之云亡哀此風俗涉江而東究其山川顧瞻萬松

蔚乎蒼芊尚想松下幅巾杖屨迎我于門抵掌笑語豈其忽焉斂茲一壟俛仰空山草木再春平生故人幾半天下紛然日中掉臂莫夜我非至人心有往來斗酒隻雞聊寓我哀尚享

祭張子野文

年月日蘇軾謹以清酌庶羞之奠昭告于故子野郎中張文之靈仕而忘歸人所共蔽有志不果日月其逝惟余子野歸及強銳優遊故鄉若復一世遇人坦率真古愷悌龐然老成又敏且執清詩絕俗甚典而麗搜研物情刮發幽翳微詞宛轉蓋詩之裔坐



此而窮鹽米不繼歎歌自得酒輒詣我官于杭  
始獲擁篲歡欣忘年脫略苛細送我北歸屈指默  
計死生一訣流涕挽袂我來故國實五周歲不我  
少頃一病遽蛻堂有遺像室無留壁人亡琴廢帳  
空鶴唳酌觴再拜淚溢兩眦尚享

祭陳令舉文

嗚呼哀哉天之生令舉初若有意厚其學術而多  
其才能蓋已兼百人之器既發之以科舉又輔之以  
令名使取重於天下者若將畀之以位而令舉亦能  
因天之所予而日新之慨然將以身任天下之事夫

豈獨其自任將世之士大夫識與不識莫不望其如  
是何一奮而不所以至於斥一斥而不復以至於死  
嗚呼哀哉天之顧付為偶然而無意耶將亦有意  
而人之所以周旋委曲輔成其天者不至耶將天既生  
之畀斯人而人不用故天復奪之而自使耶不然令  
舉之賢何為而不立何立而不遂使少見其毫末  
而出其餘弃必有驚世而絕類者夫子與令舉別  
二年而令舉沒既沒三年而子乃始一哭其殯而弔  
其子也嗚呼哀哉尚享

祭任師中文一首



年月日眉陽陳慥蘇軾健為王齊愈弟齊萬黃  
州進士潘丙古耕道謹以茶果清酌之奠致祭于  
故瀘州太守任大夫師中之靈曰允義大夫維蜀  
之珍詩之老成易之丈人去我十年其德日新庶一  
見之遽沒元身惟慥與軾匪友則親自丙以降昔  
惟州民旅哭于庭惻焉酸辛禍福之來孰知其因  
自壽自夭自屈自信天莫為之矧凡鬼神生榮死  
哀自昔所難持此令名歸于九原尚享

祭堂兄子正文一首

維元豐五年歲次壬戌正月癸未朔三日乙酉弟晝

授黃州團練副使軾謹以家饌酒果之奠昭告于故子  
正中舍大兄之靈昔我先伯父內行飭修閭里之師不  
剛不柔允武且文喜愠莫窺歷官十一民到于今涕泣  
懷思遇其所立仁者之勇雷霆不移薦生我兄和擾而  
毅甚似不衰與人之周肅雍謹絜喜見于眉人各有心  
酸鹹異嗜丹素相訾穆穆我兄尊賢容衆無適不宜天  
若不惜富貴壽考捨兄畀誰云何不淑而止於是命也  
可疑我遷于南老與病會歸耕無期歛不撫棺葬不執  
紼永恨何追寐東山兩塋相望拱木參差諸父父子平  
生之好相從歲時兄死而同我生而異斯言孔悲千里



一樽兄實臨我尚醕勿辭嗚呼哀哉尚享

黃州再祭文與可文一首

年月日從表弟具官蘇軾謹以清酌庶羞之奠昭告  
于亡友湖州府君與可學士文兄之靈嗚呼哀哉我  
官于岐實始識君甚口秀眉忠信而文志氣方剛談  
詞如雲一別五年君譽日聞道德為膏以自濯薰  
學之多蔚如秋蕢脫口成章繁莫可耘馳騁百家  
錯落紛紜使我羞歎筆硯為焚再見京師默無所云  
杳兮清深落其華芬昔執我黍今熟其饋啜漓歌  
呼得淳而醺天力自然不施膠筋坐了萬事氣回

三軍笑我皇皇獨違垢紛俯仰三州眷戀桑粉仁施  
草木信及靡靡昂然來歸獨立無群俛焉復去初無  
戚欣大哉死生悽愴蒿君君沒談笑大鈞徒勤喪  
之西歸我竄江濱何以薦君採江之芹相彼日月  
有朝必曛我在茫茫凡幾合分盡此一觴歸安于墳  
嗚呼哀哉尚享

祭徐君猷文一首

故黃州太守朝請徐公君猷之靈惟公蚤厭綺紈富  
以三冬之學晚分符竹藹然兩郡之聲家世名臣始  
終循吏追繼襄陽之耆舊綽有建安之風流無



鬼高談常傾滿坐有功陰德何止一人軾以蠢愚  
自貽放逐妻孥之所竊笑親友幾於絕交爭席滿  
前無復十將水而五醜中流獲濟實賴一壺之千金  
曾報德之未皇已興哀於永訣平生髣髴尚陳中  
聖之觴厚夜渺茫徒挂初心之劍拊棺一慟嗚呼  
哀哉尚享

祭陳君式文一首

故致政大夫君式之靈猗歟大夫匪直也人矯然不  
隨以屈莫信大夫安之有命在大十年躬耕以娛其  
親親亡泣血幾以喪明免喪復仕哀哉為貧從政于

黃急吏緩民食黃之薇飲其水泉我以重罪竄于江  
濱親舊擯跡我亦自憎君獨顧交日造我門我不  
自愛恐子垢紛君笑絕纓陋哉斯言憂患之至期  
與子均示我數詩蕭然絕塵去黃而歸即安丘園  
澹然無求抱潔沒身猗歟大夫有死有生如影之  
隨如環之循富貴貧賤忽如浮雲孰皆有子如二子  
賢千里一觴侑以斯文尚享

祭蔡景繁文一首

嗚呼哀哉子之為人清厲孤峻經以仁義緯以忠信  
才兼百夫歛以靜順子之事君惓惓傾盡挺然不倚



視退如進持其本心不負堯舜子之從政果藝清慎  
緩民急吏不肅而震紛紜滿前理解迎刃子之為文  
秀整明潤工於造語耻就餘餒詩尤所長鏘然玉振  
壽以配德天亦何吝有如子賢五十而盡我遷于黃  
衆所遠擯惟子之故不我籍麟孰云此來乃拊其櫬  
萬生擾擾寄此一瞬富貴無能俯仰埃燼子有賢子  
汗血之駿幼亦頎然頥發齟齬天哀子窮以是餽贐  
我困于旅愧莫子賑歌此奠詩以和虞殯嗚呼哀哉

祭歐陽伯和父文一首

嗚呼哀哉文忠之子譬之孔明則其高弟其材不同

而皆有得公之一體惟伯和父得公之學甚敏且執  
罔羅幽荒掎撫遺逸馳騁百世有求則應取之左右  
不擇鉅細如漢伯喈如晉茂先餘子莫繼公薨一紀  
門人凋喪我老又廢退而講論放失舊聞日月其逝  
欲操簡牘從伯和父解發疑藪今其亡矣誰助我者  
投筆掩袂斯文日化躡風系景安所止戾子獨確然  
求之度數斷以凡例抱其孤學將以安適鑿不謀枘  
歸從文忠與仲純父孰曰非計而我何為寓詞千里  
繼以泣涕嗚呼哀哉

祭石幼安文一首



嗟我去蜀十有八年夢還故鄉親愛滿前覺而無有  
淚下迸泉竄流江湖隻影自憐聞人蜀音回首粲然  
矧如夫子又戚且賢憂樂同之義不我捐我行過宿  
子病已纏顧我而笑自云少痊念子仁人壽骨隱顧  
携手同歸相視華顛孰云此來拊膺號天同驅並馳  
俯仰而遷行即此路皇分後先哀哉若人令德世傳  
才子文孫森然比肩天不吾欺後將蟬聯永歸無憾  
舉我一盞嗚呼哀哉

祭司馬君實文一首

左僕射贈太師溫公之靈嗚呼百世一人千載一時

惟時與人鮮偶常奇公事仁宗百未一施獨發大議  
惟天我知厚陵之初先事而親帝欲得民一尊無私  
母子之間莫如孝慈人所難言我則易之神宗知公  
敬如著龜專談仁義輔以書詩枉尺直尋顧公少卑  
公曰天子舜禹之姿我若言利非天誰欺退居于洛  
四海是儀化及豚魚名聞乳兒二聖見公曰予得師  
付以衡石惟公所為公亦何為視民所宜有莠則鋤  
有疾則醫問疾所生師老民疲和戎上策決用無疑  
此計一定太平可基譬如農夫既闢既菑投種未粒  
矧穫而炊賓客滿門公以疾辭不見十日入哭其帷



天為兩泣路人垂淚畫像千家飲食必祠矧我衆僚  
左右疇咨共載一舟喪其揖維終天之訣寧復來思  
歌此奠章以侑一卮嗚呼哀哉尚享

祭王宜甫文一首

維元祐二年歲次丁卯九月庚戌朔十九日戊辰具  
位蘇軾謹以酒果之奠昭告于故比部郎中贈光祿  
大夫王公宜父親家翁之靈嗚呼宜父篤厚寬中德  
世其家而位莫克非不能克知有天命直已而行不  
克何病三公之子所乏非財風雨散之如振浮埃百  
年夢幻其究何獲不與皆忘令名令德公雖耆舊我

尚同時不識其人想見其姿婚姻之好義貫黃壤有  
愧古人不祖其往往謂趙人子孫其昌蔣其墓櫬我  
言不忘嗚呼哀哉

祭范蜀公文一首

嗚呼仁宗在位四十二年畦而種之有得皆賢既歷  
三世悉為名臣今如晨星存者幾人孰如我公碩大  
光明導日而昇燦焉長庚生死契闊公獨壽考天實  
耆之以殿諸老二聖嗣位仁義是施公昔所言略行  
無遺維樂未和公寢不寧樂成而薨公往則瞑凡百  
君子願公無極胡不萬年以重王國責難之忠愛莫



助之嗟我後來誰復似之吾先君子秉德不耀其公  
弟兄一日之少窮達不齊歡則無間豈以閭里忠義  
則然先君之終公時在陳宵夢告行晨起訃聞先友  
盡矣我亦白髮聞公之喪方食哽噎堂堂我公豈其  
云亡望公凜然猶舉我觴

祭黃幾道文

幾道大夫年兄之靈嗚呼幾道孝友烝烝人無間言  
如閔與曾天若成之付以百能超然騁德風驚雲騰  
入為御史以直自繩身為玉雪不汙青氈  
不綴不緼姦民快吏實畏德





